

Date – 06/11/2024

Time - 18:30 -18:40Hrs

- Sinlung Hills Council inthlana New Vervek biala vote tla te chu Aizawl-a DC Office ah vawiin tlai dar 4 atang khan chhiar that leh a ani a, result ngaihchan mek a ni.
- Governor Dr Hari Babu Kambhampati leh Chief Minister Pu Lalduhoma ten ICFAI University Mizoram Convocation vawi - 12na an hmanpui.
- Sawrkar laipui chuan zirlai thiamtheite suma puihna tur PM-Vidyalaxmi scheme a pawm.
- Republican candidate Donald Trump chu US President atan thlan tlin a ni a, Prime Minister Narendra Modia chuan a lawmpui thu a sawi.

<><><>

Sinlung Hills Council inthlana New Vervek biala vote tla te chu Aizawl-a DC Office ah vawiin tlai dar 4 atang khan chhiar that leh a ani a, result ngaihchan mek a ni.

New Vervek Constituency-ah thil fello thleng a awm ni a complain hrang hrang a luh hnuah State Election Commission chuan hemi chungchang hi vawiin khan a ngaihtuah a, complain bakah hian District Election Officer leh Observer report atanga a lan danin inthlan vote thlak chungchangah lungawilohna sawi tur a awm lova vote erawh Election Observer telin, DEO kaihhraina hnuaiah chhiar that ni se a ti a ni.

Complain thehluttu te hi New Vervek VCP leh Secretary leh MNF Unit President an ni a, heng mite hian vote chhiar chungchang ringawt an sawisel avangin vote thlak that tul an ti lo a, chhiar that a, a chhiar tute pawh mithar vek dahin, party agent te pawh an tel tir vek a ni.

Hemi chungchanga kan corr SEC Secy Pu K Laldingliana a biakna lo ngaithla ang.

MNF Party Tuivawl North Block thuchhuah tarlan danin, New Vervek Constituency-ah thil fel lo tam tak a awm ngei nia hriat anih avangin hemi-a mawhphurtu Returning Officer (RO) chungah a tûl anga hma la nghâl tûrin sawrkar an phût tlat tih an sawi a.

An lungawilohna te sawiin Vote chhiar laiin round tin mipui hriata puan a ni lova, New Vervek Postal ballot-in dârkar thumin vote chhiarna hmun tûr a thleng tlai bîk a, hemi chhûng zawng hian ballot box hi BLO, ZPM Official candidate fanuin amah chauhin a awmpui a ni an ti a, Vote hi tum thum chhiar a ni a, total vote a danglam vek zêl a. Vote tla zawng zawng leh candidate te total vote a inmil lo vek bawk a ni an ti.

Vote thi chu Counting Agent te hriatpuina lovin a danglam an ti bawk a ni.

Sinlung Hills Council inthlan vote tla te hi New Vervek tih loh chu nizan khan chhiar zawh a ni a, MNF leh HPC-R tangkawp chuan seat 7 la in hnehna an chang a ni.

Sinlung Hills Council bial 12 a polling station 38 a vote nimina vote thlak naah vote zaa 71.69 a tla a, nizan khan vote chhiar nghal niin MNF leh HPC-R tangdunin seat 7 la in hnehna an chang a, rorellai ZPM leh HPC tangdunin seat 3 an laa, Congress Party in seat 1 an la a ni.

MNF Party leh HPC-R tangdun hian Ratu, Zohmun, Tinghmun, Saipai, Vanbawng, Ratu leh Sakawrdai North leh Sakawrdai South an la a. ZPM leh HPC tangdunin Phuaibuang, Suangpuilawn leh Saipum la in, Congress Party in Khawlian ah seat an la a ni.



MNF PRESIDENT

MNF President Pu Zoramthanga'n Sinlung Hills Council-a an chak chuan inthlan awm chho leh turah an party tan hmasawna a thlen a beisei tih a sawi.

Akashvani corr nen an inkawmna ah he thu hi sawiin Pu Zoramthanga chuan Sinlung Hills Council inthlan chu sawrkar hrawn laia mipui ngaihdan mar dehna a ni a ti a, an chakna chu MNF tan hlawkna lian tak ani tih sawiin Village Council, Local Council leh inthlan dang lo awm zel turah MNF tan hmasawna a siam ngei a beisei tih a sawi.

MNF President chuan ZPM in nikuma Sawrkarna an siam hnu kum 1-na Sinlung Hills Council-a seat 3 chiah la theia an awm chu an tlakhniamna lantirna a ni a ti a, enchhin an dawlo hle tih sawiin mipuiin an rinna chu kum khatah a tlahniam nasa hle a ti a, Politics kaldanah Ruling party chuan Council inthlan ah hnehna sang tak chang thin annih laiin ZPM erawh mipui beisei an phak loh em avangin hnawl an ni a ti a, sum harsat lai takin buhfai man leh oil man tisangin an thusawi apiangah mipuite hriatthiamna dil aiin vauna thu a tam zawk avangin reilote ah mipuiten inthlanna awm hmasa ah an paih thla a ni a ti.

ZPM Party chuan thuchhuah siamin Hmar tlangdung hmasawna turin ZPM Party leh Ministry chuan theih tawp a chhuah zel dawn an ti a, tun dinhmunah Council bial zawng zawngah politics harhtharna la thleng rih lo mahse, a tahtawl leh hmatiam zela Kalphungthar mipui Sorkar a din chhoh zel an beisei an ti a ni.

MPCC President Pu Lal Thanzara chuan an beisei ang result pha lo mah se, Congress party in hmasawna nasa tak a nei a ti a, Khawlian Constituency a voters te chungah lawmthu sawiin an Candidate Pu Lalrawngbawla thlangtlingtute chu opposition bial ni dawn mahse an thlahthlam dawn lo a ni a ti.

PC Party pawhin thuchhuah siamin, Sinlung Hills Council Inthlan neih zawh taka thlan tlin zawng zawng te PC Party chuan an lawmpui an ti a, Hnehna changtu MNF chu State sorkar nena mipui tana tha taka thawkho turin duhsakna an hlan a, inthlan-a vote chhiar chungchanga New Vervek biala thil thleng hi chhui chian a, a hnu zela hetiang thil hi a thlen tawh loh nana hma la turin sorkar an duh tih an sawi a ni.



ICFAI CONVOCATION

Governor Dr Hari Babu Kambhampati leh Chief Minister Pu Lalduhoma ten ICFAI University Mizoram Convocation vawi - 12na ICFAI University Campus, Durtlang North-a vawiina neih an hmanpui a,

Governor chuan zirchhuak tharte a lawmpui thu a sawi a, convocation chu zirna lama mellung thar pawimawh anih thu sawiin ICFAI University Mizoram chu thiamna rintlak chherchhuak tura hma la zel turin duhsakna a hlan a ni.

Chief Minister Pu Lalduhoma pawhin thusawiin khawvel hmasawn zelah ei leh bar zawna lamah remchanna thar tam tak inhawng hmang tangkai thei turin zirna lamah an insawrbing nasat a tul tih a sawi. Chief Minister chuan pass tharte chu a lawmpui thu leh an hmabakah theitawp chhuah zel turin a chah a, tunlai khawvel zirna sang zel karah zirlaite chu dikna leh rinawmna, zaidamna nei tura fuihin an thiamna chu anmahni tan chauha hmang lova khawtlang leh ram tana chhenfakawm ni turin a chah a ni.

Convocation-ah hian kum 2024- a ICFAI University Mizoram atanga Under Graduate leh Post Graduate zir chhuak mi 207 te hnenah Degree hlan an nih bakah zirlai titha bikte hnenah Gold leh Silver Tangkapui hlan an ni bawk.

Hei bakah hian Cachar Cancer Hospital and Research Center a Director ni mek, Dr. Ravi Kannan, hnenah cancer enkawlina lama a thawhhlawk avangin Doctor of Science (D.Sc) hlan a ni bawk.

<><><>

MZI

Environment, Forest & Climate Change Minister Pu Lalthansanga'n Mizoram mawina leh nawmna bakah a ralmuanna hnam dang te hriat theiha pholan tam a pawimawh a ti.

He thu hi vawiina hla phuahtute intawhkhawmpui I&PR Conference Hall-a buatsaih a hmanpuina ah sawiin Minister chuan Mizoramah thu leh hla lama tui mi an awm belh chu lawmawm atih thu sawiin hmasawna a awm chho zel a ti a, hla tam tak siam tawh zingah inneih lam hla a tlem tih sawiin hla phuah thiam ten theihtawp chhuah turin a chah a, Mizoram mawina leh hlutna pho chhuak tam zel turin a chah a ni.

He hun hmanpuitu All India Radio Director leh Mizoram Cluster Head Pu DR Lalropuia chuan hla chu mihring rilru leh ngaihndan thlak theihna kawng pawimawh tak ani a ti a, tunlai khawvela midang ngaihsakna a tlem tawhna ah hla phuahtute chu midangte dinhmun hrethiamtu leh harsatna an tawh changa in awm tleina ber siam chhuaktu an nih avangin an pawimawh hle a ti a, mi harsate tana lungphum pawimawh ni zel turin a chah a ni.

Vawiina hun hman hi MZI Song Writer's Chairman Pu Lalhmachhuana Zofa in a kaihruai a, hla inphuahsiak lawmman sem niin zaithiam hrang hrang leh hlaphuahtute an kal khawm a ni.

<><><>

MAMIT-MINORITY MEMBER

National Commission for Schedule Tribe member Pu Nirupam Chakma chuan vawiin khan Mamit tlawhin, Mamit a I&PR Conference Hall, Mamit-ah Mamit District chhunga Minority te kawmin, Dept hrang hrang head te nen Review Meeting an nei zui a ni.

Pu Nirupam Chakma chuan India ramah hian Schedule Tribe vaibelchhe 10 chuang an awm mek a, enge harsatna an neih a, eng dinhmunah nge an awm tih hmuhsak tura tlawh an nih thu sawiin, an harsatna leh mamawhte thlen turin a ti a a ni.

He hunah hian NH 108 kawngpui thalo leh Rajiv Nagar to Kawnpui inkar kawng chhia te lo thlen a ni a.

Bank hrang hrang ten education loan, agriculture loan leh loan dang te pawh an pek chhuah that duhloh thu anlo thlen a ni a.

Hemi bakah hian, Mamitah Tribal community inn, leh District cultural Centre te leh De Addiction Centre din anih theihna turin ziakin anlo thlen a ni.

District Bawrhsap Pu Jacob Lalawmpuian Mamit District dinhmun a tarlan danin, literacy percentage hi zaa 84.92 a ni a, kum 14 hnuai lam school kallo 504 an awm mek thu tarlan ani.

Hemi hnu hian District Hospital leh JNV school te a tlawh bawk a ni.

Pu Nirupam Chakma hi Pu Konthang Tauthang Adviser, Pu RK Dubey Deputy Director, Pu Akash Tripathy Senior Investigator leh Dillip Kumar Kanti Chakma Legal consultant ten an tawiawm a ni.

<><><>

AIR NEWS ON SOCIALMEWDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

PM-VIDYALAXMI

Sawrkar laipui chuan zirlai thiamtheite suma puihna tur PM-Vidyalaxmi scheme a pawm. Union Information & Broadcasting Minister Ashwini Vaishnaw chuan hemi chungchanga Union Cabinet thutlukna hi chanchinbumite hmaah sawiin zirlai zingah zirna sang zawka kal zel duh tan he tanpuina hi siam a ni a ti a. Sum leh paia harsatna avanga zirna sang zawk chhunzawm thei lo zirlai an awmlahna turin he scheme hi sawrkarin a kalpui tur thu a sawi a ni. Hei bakah hian Pu Vaishnaw chuan Food Corporation of India tana cheng vaibelchhe sing 1 leh 700 senna tur sawrkarin a pawm thu a sawi a. Hei hian ram puma FCI hnathawhna kawngah hmasawna thui tak a thlen dawn a ni a ti.

<><><>

ASSEMBLY ELECTIONEERING

Jharkhand leh Maharashtra Assembly inthlan campaign-in vanglai a thleng chho mek a. Jharkhand-ah chuan NDA leh INDIA bloc ten an party candidate te tan vote hui tumin tan an la mek a. Jharkhand-a BJP incharge Shivraj Singh Chouhan chuan JMM leh Congress te chu mipuite bumah a puh a. Hetihlai hian JMM hruaitu leh Chief Minister Hemant Soren chuan BJP chu diklo taka amah paihthlatuah a puh a ni.

Maharashtra-ah chuan political party hruaitu senior ten hmun hrang hrang theihtawp chhuahin campaign beihpui an thlak a. Congress hruaitu leh Lok Sabha Opposition leader Rahul Gandhi chuan vawiin khan campaign a hawng a. Nagpur ah MVA hruaitute nen hun an hmang a ni.

<><><>

US PRESIDENT

Republican candidate Donald Trump chu US President atan thlan tlin a ni a, Prime Minister Narendra Modia chuan a lawmpui thu a sawi. Donald Trump-a hian a khingpui Democrats candidate Kamala Harris a hneh a. Florida-a Palm Beach-ah a tlin lawmna thusawiin amah thlawptuten beiseina awm lantirtu a ni a ti. President inthlanah hian electoral vote hmuh ngai zat 270 hmu pelin state pawimawh pahnih Pennsylvania leh Georgia-ah a chak a ni.

Prime Minister Narendra Modia chuan Donald Trump chu alawmpui thu sawiin a term hmasaah hlawhtling takin hna a lo thawk tawh a, India leh US inlaichinnaah tun aia tha zawka tuaithar leh a beisei thu a sawi a ni.

<><><>